

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**D. Gebh. Theodori Meieri Theologi & Prof. in Academia  
Julia Antichiliasmus Absolutissimus**

**Meier, Gebhard Theodor**

**Helmstadii, 1696**

§. LXXXIX.

**urn:nbn:de:bsz:31-105465**

mites; quoniam hereditate possidebunt terram Matth. 5.  
 Et Propheta Esaias c. XXVI. 6. Pedes mitium & humili-  
 liam calcabunt eam. (NB. D. Animadvertenseadem  
 in Præfatione recitans loco postremorum substituit:  
 Pedes mitium & humilium conculcabunt superbos,  
 eum tamen ita nec in diatyposis nec in adducto  
 Esaiæ loco habeatur.) Ad hæc breviter respondeo  
 (1) posse omnia non incommode accipi de vita æter-  
 nâ, quæ suo modo utiq; terra viventium appellari po-  
 test. (2) Totus ille Gelasii liber plane suspectus est,  
 ipse enim Autor initio operis fatetur, se concilio huic  
 non interfuisse, sed è vetustissimis & anonymis mem-  
 branis excerpisse, unde nec ipse potuit scire, num  
 membranæ illæ historiam Concilii exacte & sine ad-  
 mixtis figmentis exhiberent. Imo & hoc ipsum pa-  
 rum fidei promereri ostendunt Guilielmus Cave, &  
 Rivetus de Scriptoribus Ecclesiasticis, notantes quod  
 Gelasius plurima horum ex Eusebio Pamphilo, Socra-  
 te & Sozomeno aliisque, qui ante ipsum vixerunt, ex-  
 scripserit, ut adeo illud de antiquis membranis saltem  
 ab ipso fictum videatur, ad majorem auctoritatem A-  
 ctis suis conciliandam. Quam ob causam etiam Do-  
 ctissimi Viri, & imprimis laudatus Cave, pleraque  
 horum Actorum ex ipsius Gelasii cerebro profluxisse  
 arbitrantur. Denique suspectum plane hunc librum  
 reddit illud, quod haud pauca continet genuinis Histo-  
 riarum Ecclesiasticarum Scriptoribus plane contraria,  
 v. g. de pugna Orthodoxorum cum Arianis super di-  
 vinitate Spiritus S. &c. quorum plura annotat Præfa-  
 tio libri ex Editione Romanâ, ut adeo Acta hæc Ge-  
 lasii non possint adduci pro legitimo teste rerum quæ  
 in Concilio Nicæno gestæ sunt.

LXXXIX. Nec pati porro potest D. Animad-  
 ver-

vertens, quod in Programmate nonnulli ex Antiquitate dicuntur in materiâ de regno chiliastico exorbitasse. Verum, si hoc dicere in vitio positum est, quid fiet de tot falsis dogmatibus, quæ in primitivâ Ecclesiâ per Traditiones propagata apud excellentissimos etiam Ecclesiæ doctores obtinuerunt? Colligit horum magnam farraginem B. Chemnit. Exam. Conc. Trid. Part. I. de octavo genere Traditt. p. m. 141. seqq. ita Clemens Alexandr. l. 1. Stromatum, Græcis Philosophiam idem fuisse docet, quod lex Judæis, multosque per illam salvatos censet, multas vias ad salutem esse præsupponens. Hanc doctrinam dicit esse ex mysteriis, quæ non palam & universis; sed secreto & paucis tradita fuerint ab Apostolis, cum tamen D. Paulo manifeste repugnet. Egregie hoc commentum refutat ipse Tertullianus de præscript. adversus hæreticos, ex eo, quod Christus præceperit discipulis, ut, siquid in tenebris audierint, in luce & tectis prædicarent &c. Ita ex eadem Traditione Clemens l. c. accepisse vult, quod Christus uno anno tantum docuerit & prædicarit, cui contradicit Irenæus l. 2. c. 39. volens Christum circiter annum ætatis quinquagesimum fuisse crucifixum, uterque graviter in Scripturas inpingens. Porro l. 2. Strom. vult Clemens Alexand. Apostolos post mortem etiam mortuis prædicasse; item locum etiam esse pœnitentiæ post mortem l. 4. quod commentum supra est refutatum. Plura recenset B. Chemn. l. c. & possent etiam illis haud pauca addi, nisi Patrum mendas tegere potius, quam omnibus exponere deceret: Soli quippe Clementis libri Stromatum talibus adeo sunt referti, ut in illis nemo orthodoxus tantum Viri ingentes lapsus suppressere aut negare, vel etiam approbare valeat.

M

XC.